

04/09/1998

Pengerusi AIG sokong langkah Malaysia

PENGERUSI syarikat perkhidmatan kewangan terbesar Amerika Syarikat, American International Group Inc (AIG), Maurice R Greenberg menyatakan sokongan padunya terhadap tindakan Malaysia mengehendkan urus niaga spekulatif ringgit dan pasaran saham.

Dalam sepucuk suratnya kepada Perdana Menteri, Datuk Seri Dr Mahathir Mohamad kelmarin, Greenberg berkata: "Saya mahu anda tahu bahawa saya menyokong penuh keputusan anda bagi mengehendkan urus niaga spekulatif ringgit dan pasaran saham."

Menurut beliau, pelabur harus bersedia melabur bagi tempoh yang lebih panjang serta tidak dibiarkan mempunyai kemampuan untuk mengeluarkan dana dari sesebuah negara hanya dengan alasan yang terlalu kecil.

Greenberg menambah, kestabilan adalah mustahak untuk pemulihan dan sehubungan itu, keputusan yang dibuat Malaysia itu bukanlah penghalang kepada pelabur jangka panjang serta mereka yang mempunyai keyakinan terhadap masa depan negara ini.

Selasa lalu, Bank Negara Malaysia (BNM) mengumumkan peraturan baru pertukaran asing yang antara lainnya mengawal keluar masuk dana di negara ini, menjadikan ringgit sebagai mata wang yang tidak sah diperlakukan di luar negara (bertujuan mengelakkan mata wang berkenaan daripada dijadikan komoditi dagangan, sekali gus menghalang kegiatan urus niaga spekulasi) dan penetapan nilai ringgit.

Greenberg adalah antara beberapa tokoh antarabangsa yang menyatakan sokongan mereka terhadap langkah drastik Malaysia itu.

Kelmarin ahli ekonomi Amerika Syarikat, Paul Krugman turut memberikan sokongan beliau.

Krugman antara lain berkata, langkah itu memberikan ruang kepada pelaksanaan lebih banyak polisi kewangan dan fiskal seterusnya menggalakkan pemulihan di dalam ekonomi benar.

AIG, yang berpangkalan di New York serta beroperasi di 130 negara, adalah pemilik salah sebuah syarikat insurans terbesar di dunia, American International Assurance (AIA).

Dewan Perniagaan dan Perindustrian Antarabangsa Malaysia (MICCI) menyifatkan peraturan kawalan mata wang yang diumumkan Selasa lalu sebagai penyelesaian jangka pendek yang baik bagi menangani masalah ekonomi yang dihadapi negara ketika ini.

Presidennya, Datuk Jorgen Bornhoft, berkata langkah itu sesungguhnya akan menyediakan kelegaan kepada kegiatan perniagaan di negara ini, terutama sektor pembuatan.

Menurutnya, MICCI juga gembira kerana jelas tiada sekatan terhadap kemasukan modal dan membawa pulang keuntungan serta dividen.

Beliau menegaskan, dalam usaha memastikan kejayaan langkah itu, pihak berkuasa perlu melaksanakan pembaharuan yang digariskan dalam Pelan Pemulihan Ekonomi Negara (PPEN), terutama ketelusan, pentadbiran korporat dan perlindungan pemegang saham minoriti.

"Dewan juga berharap langkah itu akan mencapai matlamatnya untuk membawa kestabilan ekonomi serta membolehkan Malaysia membangunkan semula kekuatannya sendiri," katanya.

(END)